

玉清无上内景真經

大羅真天元天大聖后紫華天母下傳

爾時

元始至真大聖化生開天以其大神通力大智慧力結造世界配合陰陽主張造化先於大梵具天玄空之中化諸外象以表内景而分九氣為東方木精之色結化九氣丈人而君主之在人為肝為魂次分七氣為西方金精之色結化七氣丈人而君主之在人為肺為魄次分三氣為南方火精之色結化三氣丈人而君主之在人為心為神次分五氣為北方坎精之色結化五氣丈人而君主之在人為腎為精四方餘氣水火金木分布中央為黃庭之色結化一氣丈人而君主之在人為脾為思五臟合識共具十真十真之英能成九轉聚為丹藥散為甘露周旋上下煉養百骸沐浴留清消陰鑄陽復我太初保我大金出于崑崙入于太淵引其龍變經於虎城四氣和合成我至真衰殘易感耄耄還嬰朽容再鮮白髮重青顏如鍊發身如羽輕盡更

凡骨飛昇上清世之學士立戒持定而生智明以其三力永保億年履輕清之氣運定變化以超仙也左右二玄无極真宰以我此道廣布天人使其捨離无常之業而入真一之妙非老非死湛寂常存

元始真尊於其七竅放大光明照无量土萬二千天百億人界各以自力敷香雨華而為寶華莫不欣悅咸悟本心爾時

玉清化宮於空玄中忽見寶月光明照映内外十虛寶月之中包含紫炁之内有一嬰兒

坐寶華臺口放金光發大玉音而說偈曰

一心生正定 萬象自然陳 逐方分五氣 五氣孕一靈 一靈通變化 結煉本來真 本真非有相 非有亦非无 兆能通此理 方悟攝塵珠

玄空之中月光之内玉嬰演教天上天下一時皆聞莫不慧海湛然業山摧毀反觀内照永契道真仰望聖光拜禮而去敬信奉持

玉清无上内景真經

太上真一報父母恩重經

元始天尊在西那玉國七寶城中琉璃宮内與諸天仙如常說法无執數眾周匝圍繞爾時眾中有一仙人名曰上智作禮前進而白天尊臣從昔劫以來屢聞正道惟報父母恩重未觀因緣願聽妙音為眾演說欲使來世有所稟修

天尊答曰汝當靜念在心我為汝說天下人民皆因父母寄胎誕育而得生身受炁在胎其苦无量懷胎十月迅速不停受孕滿時肢脉俱解其中非一因以喪身幼小嬰孩提携養育洗滌穢濁不憚艱辛寧損己身欲兒寧處父母恩重難報難量若或有人能為父母多修齋供廣造真經讀誦受持教人遵奉當知是人及於父母承此果報即得長生給養自然心靈快樂或薦亡沒七七修齋轉請靈文以資魂識不歷塗毒使得生天身詣玉京神遊金闕或因父母疾病纏綿建立道場修崇道法其病即愈平復如常或因父母險厄囚繫惡鬼害身蟲獸為妖夢寐驚恐但能恭

深念道修齋遠於災殃消除魔魅當以降生之日默念至親生我之恩精勤齋戒廣修衆善以報劬勞如是等人修持如上免墮幽塗生於正覺汝當遵奉宣布教化持此經典周今誇壽生不信想獲罪无量爾時上智及諸天衆既聞是語歡喜踊躍言我等衆若遇是人皆當擁護得受快樂瞻仰无已而說頌曰大慈无上尊 衆生真父母 能說報恩經 聞者皆開悟 有人精受持 不爰登仙路 略讚一毫端 稽首天尊去

太上真一報父母恩重經

元始洞真慈善孝子報恩成道經

道言左右中真結形之始分於元始无上大道應化之氣孕靈瓊胎九萬大劫幽闇寥寂九萬劫後法當應世結形理氣出於瓊胎出胎之時九天雷震九地開裂舉步之初登天寶華身出金光猶如初日二晨扶照晶彩朗耀眸有斗心星前日象綠髮斷齒紫氣連霄所在之處七素之雲晨夕陰蓋隱龍負蓮以爲林產天燈天燭照明雲路天樂天梵萬音齊鼓龍鳳撫節誦歌太平邑邑和雅非可名目甘泉甘井飲之愈疾形如金玉无有衰老无爲和化經九萬劫爾時三真化作嬰童託附真母以漸長大隨世成立无上天道元始天尊授此三真號曰至孝真王治化中國傍攝四夷有生之類咸來受事教其慈孝敬天順地守一實形憐憫萬物三千百年後又更改新所謂淘汰滓穢水大治鍊是時三真孝王一治日中二治月中三治斗中上持三晨晶耀幽玄治三氣冥適空有應變修慈不待呼召如形出影不由憶想

雖處上界道適下土无上无下无遠无際隨方設教友諸異類與其同好心无疑悞孝心高遠神力无比迴天轉地制御陰陽除促運度驅役千靈感動祥瑞无翼而飛瞬息九萬屈伸之頃已周萬天皆由至孝慈順二親憐愍一切動植之類孝道慈善好生惡殺食肉飲酒非孝道也男女穢慢非孝道也胎產屍敗非孝道也毀傷流血非孝道也偷劫竊盜非孝道也好習不善講論惡事非孝道也樂處穢賤內外流汗心形踈懶不修生道信心不篤輕浮彼好隨事故遂守一不專心氣離散生老病死種種煩惱死入地獄窮劫受苦永无出期无善因緣失吾孝道得種種苦下世男女修吾孝道與道同德既同德已與道同光既同光已與道同真既同真已與道同身既同身已與道同神既同神已與道同變既同變已與道同壽既同壽已與道同有既同有已與道同无既同无已无處不无无處不无亦无處不有有無處不有寂寥虛豁无處不无隨心應變或爲帝王或爲忠臣或爲賢